

*Dixerunt ergo ad invicem: non scindamus eam, sed fortiamur de illa, cujus sit.*

Quando de hac vestium divisione Scriptores loquuntur, nec verbum de lictoribus faciunt, solummodo milites enunciant. Unde S. Athanasius ser. de cruce scribebat: *Suspensus enim ut homo, principatus persequebatur, ipsum diabolum comprehendit, ac milites terruit, ne scinderent tunicam, ut hac manente maneret, & quæ paulo post facta est adversus Judæos redargutio; quoniam velum quidem scissum est; tunica vero Servatoris ne a militibus quidem scissa est, sed mansit integra.* Et inter pauca idem S. Doctor subnectit: *Milites vestes Christi dividunt in quatuor partes, eo quod pro peccatis mundi quadrifariam divisi, ad exortum, occasum, septentrionem, ac meridiem, gestabat illa.* Hoc autem fecisse milites ad ignominiam Christo augendam, & afflictionem, docet Cornelius a Lapide in cap. 27. Matth. vers. 35. *Fuit hæc insignis Christo ignominia & afflictio, quod coram se videret insolenter vestes suas a militibus lacerari, & alea jacta sorte dividi.* Hinc Chrysofomus ex hac vestium divisione, non dividendium vilitatem, sed in Christum vilitatis ignominiam objectam, colligit: *Vestes inter se partiuntur, quod in condemnatis vilibus, & abjectis fieri solet, ac omnino destitutus.*

Ex aliis verbis, quæ Euangelium subdit, colligitur quoque, milites hosce non fuisse lictores. Si enim lictores fuissent, post expletum munus, post divisas vestes, abiissent, nec in Calvario ulterius morati essent, vel ad Christum observandum, vel etiam ad custodiendum. Hoc nanque munus erat militum, non lictorum; quorum tantum erat officium cruci reum affigere, & vestimenta reportare. At in Evangelio legimu